
LE CHAPITRE DE LA FIGVE,
*contenant huit versets, escrit
à la Meque.*

AV nom de Dieu clement & misericordieux.
Le iure par les figues & par les oliues, par le
Mont de Sinai, & par la seureté & franchise qui est
dans cette ville (de la Meque,) que nous auons creé
l'homme avec proportion, apres nous l'auons rendu
mesprisable, excepté les vray-croyans qui font de
bonnes œuures, ils receuront vne recompense infi-
nie. Apres cela (ô impie) qui te fait blasphemer con-
tre la foy! Dieu n'est-il pas le Iuge des Iuges.

LE CHAPITRE DV SANG
*congelé, cortenant dix-sept versets,
escrit à la Meque.*

*Le Bedaoui & Gelaldin intitule ce Chapitre de
la Lecture.*

AV nom de Dieu clement & misericordieux.
Lis l'Alcoran, & commence par le nom de Dieu
qui a tout creé, qui a creé l'homme d'un peu de Sang
E E c c ij

congelé. Lis l'Alcoran, & exalte la gloire de ton Seigneur qui a enseigné l'écriture à l'homme, qui luy a enseigné ce qu'il ne sçauoit pas, neantmoins il est dans vne grande erreur, il ne veut pas considerer qu'il retournera deuant Dieu. As-tu considéré celuy qui a voulu empescher vn des seruiteurs de Dieu de faire ses prieres ? As-tu cognu s'il estoit dans le chemin de salut ? As-tu veu s'il a blasphemé, s'il a abandonné la foy ? Ne sçait il pas que Dieu l'abandonne ? S'il ne desiste, il sera traîné par les cheueux dedans le feu d'Enfer avec les meschans, il quittera le lieu où ils s'assemblent pour disputer contre la foy, & les Demons le precipiteront dans les flammes eternelles. Ne desobeis pas aux commandemens de Dieu, perseuerer en tes prieres, adore tousiours Dieu, l'obeissance à ses commandemens t'approchera de sa diuine Majesté.

LE CHAPITRE DE LA GLOIRE
ou puissance, contenant cinq versets,
écrit à la Meque.

AV nom de Dieu clement & misericordieux. Nous auons enuoyé l'Alcoran la nuit de gloire & de puissance. Iene t'ay pas enseigné les graces de cette nuit de gloire & de vertu. Les prieres & les bonnes œuures qui se font cette nuit ont plus de merite & plus d'efficace que celles qu'on fait en mille mois